

प्रमुख समाचार –

- 1— मुख्यमंत्री साय बस्तर संभाग म नक्सली समस्या ल लेके दीन बयान— किहीन सुरक्षा कैम्प के छवि लोगन के मन म सुविधा कैम्प के रूप म होना चाही।
- 2— छत्तीसगढ़ लोकसेवा आयोग कोति ले होवइया परीक्षा ल पारदर्सी बनाय के संबंध म सुझाव देबर आयोग के करे गेहे गठन।
- 3— रक्षा मंत्री राजनाथ सिंह ह तीन लाख खाली पड़े पद के संग राष्ट्रीय कैडेट कोर—एनसीसी के विस्तार के प्रस्ताव ल दीन मंजूरी।

कलेक्टर एसपी—कॉन्फ्रेंस

मुख्यमंत्री ह किहीन हे कि बस्तर संभाग म नक्सली समस्या ल कम करे बर बनाय गे सुरक्षा कैम्प के छवि लोगन मन म सुविधा कैम्प के रूप म होना चाही। राज्य सरकार लोगन के मन म सुविधा देबर नियद नेल्लानार योजना ल सुरु करे हे। श्री साय ह पुलिस अधीक्षक मन ले किहीन हे कि अपराधी मन म पुलिस के डर दिखना चाही।

उहें, मुख्यमंत्री विष्णुदेव साय ह कतकोन योजना ल लेके घलो कड़ा निरदेस देहे। ओमन ह किहीन हे कि योजना के क्रियान्वयन म कोनो प्रकार के लापरवाही नइ होना चाही। कोनो भी जिला म भ्रष्टाचार के सिकायत मिलही, त सक्त कार्रवाही करे जाही। आज वीडियो कॉन्फ्रेंसिंग ले कलेक्टर एसपी—कॉन्फ्रेंस म मुख्यमंत्री ह किहीन कि राज्य अउ केंद्र सरकार के सबो योजना ल प्रदेस के हरेक मनखे तक पहुंचाय के जरूरत हवय। कलेक्टर ह ए बात के धियान रखय कि एमा कोनो प्रकार के गलती ज्ञान होवय अउ पूरा पारदर्सिता के साथ योजना ह लोगन तक पहुंचय। लोगन मनके काम समय—सीमा म होना चाही।

मुख्यमंत्री ह किहीन कि डीएमएफ फंड के पइसा के पहिली बहुत दुरुपयोग होय हे, अब अइसन होही त संबंधित अधिकारी मनके खिलाफ कार्रवाई करे जाही। मुख्यमंत्री ह प्रधानमंत्री आवास योजना के क्रियान्वयन म तेजी लाय के घलोक निरदेस दीन हे। ओमन कलेक्टर मन ल राजस्व प्रकरण के प्राथमिकता के संग निराकरण करे बर केहे हे। संगेसंग तेंदू पत्ता संग्राहक मन ल बेरा राहत मजदूरी के पइसा देय अउ उंखर मन बर चलाय जात योजना के लाभ पहुंचाय के निरदेस घलो दीन।

अनुराग ठाकुर—प्रसार भारती

सूचना अउ प्रसारण मंत्री अनुराग सिंह ठाकुर ह आज नई दिल्ली म आकाशवाणी अउ दूरदर्शन समाचार के संसोधित वेबसाइट ल सुरु करीन। श्री ठाकुर ह संसोधित न्यूज ऑन एआईआर ऐप के संगेसंग ओमन ह प्रसार भारती प्रसारण बर साझा ऑडियो विजुअल—शब्द घलो जारी करीन।

ए मउका म श्री ठाकुर ह किहीन कि लोक प्रसारक के रूप म दूरदर्शन अउ आकाशवाणी ह कतकोन बछर ले सेवा देवत हे। ओमन ह किहीन हे कि अपन नेटवर्क के माध्यम ले दूनो लोक प्रसारक ह देस भर के हर कोना म स्थानीय भाखा ल प्रोत्साहन देके सबो मनखे के पहुंचाय हे। श्री ठाकुर ह किहीन कि प्रसार भारती अउ समाचार संगठन ल आने—आने भाखा म वीडियो—ऑडियो—फोटो अउ पठन समाग्री उपलब्ध कराय बर तइयार हे। ओमन ह ऐला क्रांतिकारी कदम बतइन। श्री ठाकुर ह किहीन कि पाछू आठ दसक ले आकाशवाणी ह सूचना के प्रसार म बड़का भूमिका निभावत हे अउ न्यूज ऑन एआईआर ऐप ह सरकारी योजना के बारे म समाचार अउ जानकारी लेके एक ठिन सक्तिसाली माध्यम हे।

रक्षा मंत्री—एनसीसी

रक्षा मंत्री राजनाथ सिंह ह तीन लाख खाली पड़े पद के संग राष्ट्रीय कैडेट कोर—एनसीसी के विस्तार के प्रस्ताव ल मंजूरी देहे। एक ठिन विज्ञप्ति के अनुसार एनसीसी के बाढ़त मांग ल पूरा करे बर देस भर के सैक्षणिक संस्थान ले कैडेट मन ल सामिल करे जाय के उम्मीद हवय। ए योजना के चलत चार नवा समूह मुख्यालय अउ दू नवा एनसीसी ईकाइ के स्थापना घलो करे जाही। मंत्रालय ह किहीन कि विस्तार योजना म पूर्व सैनिक मन ल एनसीसी प्रसिक्क के रूप म रोजगार देके प्रस्ताव हे।

आईएएस—पदस्थापना

छत्तीसगढ़ ल चार झिन नवा आईएएस अधिकारी मिले हे। राज्य सरकार ह बछर दू हजार तेईस बैच के ए चार झिन अधिकारी मनके पदस्थापना के संबंध म आदेस ल जारी कर देहे। आईएएस अनुपमा आनंद ल रईपुर, एम भार्गव ल दुरुग, तन्मय खन्ना ल बिलासपुर अउ दुर्गा प्रसाद अधिकारी ल जांजगीर—चांपा म सहायक कलेक्टर के पद म पदस्थ करे गेहे।

पीएससी—आयोग

छत्तीसगढ़ लोकसेवा आयोग पीएससी कोति ले होवइया परीक्षा ल संघ लोकसेवा आयोग यूपीएससी के तर्ज म पारदर्सी बनाय के संबंध म सुझाव देबर आयोग के गठन कर देहे। यूपीएससी के पूर्व अध्यक्ष प्रोफेसर डॉक्टर प्रदीप कुमार जोशी ल एखर अध्यक्ष बनाय गेहे। एखर संबंध म सामान्य प्रशासन विभाग ह आदेस जारी कर देहे। जेखर अनुसार ए आयोग ह परीक्षा आयोजन के वार्षिक कैलेंडर बनाय अउ परीक्षार्थी मन म आयोग के प्रति विस्वास बनाय बर घलो सुझाव देही।

कम्प्रेस्ड बायो गैस संयंत्र

रईपुर अउ भिलाई नगर निगम म सौ ले डेढ़ सौ टन हर दिन क्षमता के नगरीय ठोस अपसिष्ट म आधारित कम्प्रेस्ड बायो गैस संयंत्र बनाय जाही। मुख्यमंत्री विष्णुदेव साय अउ उप मुख्यमंत्री अरुण साव के उपस्थिति म आज रईपुर म भारत पेट्रोलियम कॉर्पोरेशन लिमिटेड, रईपुर अउ भिलाई नगर—निगम अउ छत्तीसगढ़ बायो फ्यूल विकास प्राधिकरण के बीच एक ठिन समझौता पत्र म हस्ताक्षर करे गेहे। ए बेरा म उप मुख्यमंत्री ह किहीन कि कम्प्रेस्ड बायो गैस संयंत्र की स्थापना स्वच्छ सहर अउ स्वच्छ ऊर्जा के दिसा म एक ठिन बड़का कदम हे। भारत पेट्रोलियम कॉर्पोरेशन लिमिटेड कोति ले राज्य म ए दू ठिन संयंत्र के स्थापना बर लगभग सौ करोड़ रुपिया लगाय जाही।

माओवादी—मुठभेड़

बीजापुर जिला म बोड़गा के जंगल म सुरक्षाबल अउ माओवादी मन के बीच मुठभेड़ होइस। जेमा जवान मन ह मउका ले बड़का मात्रा म विस्फोटक, माओवाद साहित्य अउ रोज के बउरती समान ल जब्त करे हे। उहे, सुरक्षा बल मन ह ए मुठभेड़ म कुछू माओवादी मनके घायल होय के दावा करे हे।

जाबना के अनुसार भैरमगढ़ थाना क्षेत्र म माओवादी मनके रहे के सूचना मिले म डीआरजी अउ एसटीएफ के संयुक्त टीम ह बोड़गा, ताकीलोड अउ उसपरी गांव कोति निकले रिहीन। इंही बेरा म बोड़का के जंगल म माओवादी मन ह सुरक्षा बल मन उपर फायरिंग सुरू कर दीन। फेर जवाबी कार्रवाई के बाद माओवादी मन ह उंहा ले भाग गीन। ए बेरा म दूनो कोति ले गोली चले ले एक झिन माईलोगिन ह घायल होगे हे, जेला ईलाज बर जगदलपुर म भर्ती कराय गेहे। जिला के पुलिस अधीक्षक ह घटना के पुष्टि करत हुए किहीन हे कि मामला के जांच करे जात हे।

मसपुर—नया कैम्प

नारायणपुर जिला के माओवाद प्रभावित मसपुर गांव म पुलिस ह नवा कैम्प खोले हे। मसपुर गांव कोहकामेटा तहसील के ओरछा विकासखंड म आथे। मसपुर म नवा कैम्प सुरु होय ले इहा रहइया लोगन मन म बड़का खुशी हवय। पुलिस अधीक्षक प्रभात कुमार ह किहीन कि मसपुर म कैम्प बने ले माओवाद उन्मूलन अभियान म तेजी आही। सरकार के नियद नेल्लानार योजना के अंतर्गत केंद्र अउ राज्य सरकार के सबो योजना ल प्राथमिकता के संग तीर—तार के पांच ठिन गांव तक पहुंचाय जाही।

बीजापुर पोटाकेबिन—मामला

बीजापुर जिला म पोटाकेबिन के बारहवी कक्षा म पढ़इया एक झिन छात्रा कोति ले एक लइका ल जनम देके मामला आगू आय हे। जेखर बाद कलेक्टर ह आश्रम के अधीक्षिका अंजू मिंज निलंबित कर दे हे। जानबा के अनुसार गंगालूर अवासीय विद्यालय म पढ़इया ए छात्रा ल पेट म पीरा उठे के बाद पाछू रतिहा गंगालूर के सामुदायिक स्वास्थ्य केंद्र ले जाय गीस, जिहां चिकित्सक मन ह उंखर गर्भवती होय के जानकारी दे गीस। जेखर सूचना मिलतेच जिला शिक्षा अधिकारी बी.आर. बघेल ह पोटाकेबिन पहुंचिस अउ एखर जानकारी लीन। ओमन ह बतइन कि ए मामला के जांच करे जात हे।

ट्रेन सुविधा

रेलवे ह यात्री मनके सुविधा ल धियान म राखत हुए दुरुग—नौतनवा एक्सप्रेस के स्टापेज ल काली ले लखनऊ रेल मंडल के लक्ष्मीपुर रेलवे स्टेसन म घलो देहे। ए सुविधा ह अवइया छै महिना बर दे जाही।

उहें, कोरबा—अमृतसर छत्तीसगढ़ एक्सप्रेस अउ अमृतसर—बिलासपुर छत्तीसगढ़ एक्सप्रेस के स्टापेज उत्तर प्रदेश के धौरा रेलवे स्टेसन म दे जात हे। इही बीच, रेलवे कोति ले होली के तिहार ल धियान म राखत हुए दू ठिन सुपर फास्ट ट्रेन ल एक फेरा बर चलाय के फइसला ले गीस हे जउन कि दुरुग— छपरा अउ दुरुग— पटना के बीच चलाय जाही। दुरुग— छपरा ट्रेन ह दुरुग ले बाईस मार्च के रवाना होही, त उहें, छपरा ले ए ट्रेन ह छब्बीस मार्च के दुरुग बर छुटही।

अइसने दुरुग—पटना होली स्पेसल ट्रेन पटना ले तेईस मार्च के रवाना होही। ए दूनो स्पेसल ट्रेन म कुल तेइस ठिन कोच हे।

